

# *Shpëtimi i Mrekullueshëm i Perëndisë*

---

***Pesë Mësime Biblike për Djem dhe Vajza***

Shkruar nga Jennifer Gowan  
Ilustruar nga Didi Greiner  
Përkthyer nga Andi Stefanllari

**JU LUTEMI VINI RE!**

Vizualet për këtë seri mund të blihen në pjesën më të madhe të zyrave të BUF-it dhe në dyqanet në internet. Për një listë të zyrave të BUF-it dhe dyqaneve në internet në Evropë, ju lutemi vizitoni [www.teachkids.eu/al](http://www.teachkids.eu/al) dhe kliko mbi “Vendet”.



Copyright © 1985, 1997 European Child Evangelism Fellowship

Të gjitha të drejtat e rezervuara. Përdorur me leje.

Mund të riprodhohet vetëm për përdorim personal, shërbese, jofitimprurës ose jo-komercial. Vizitoni [www.teachkids.eu/al](http://www.teachkids.eu/al) për më shumë detaje mbi lejen e përdorimit.

# Shpëtimi i Mrekullueshëm i Perëndisë

**Pesë Mësime Biblike për Djem dhe Vajza**

## **PËRMBAJTJA E LËNDËS**

Mësimi I	“Gjon Pagëzori tregon rrugën”	5
Mësimi II	“Nikodemi dëgjon një histori”	10
Mësimi III	“Zakeu u gjet nga Shpëtimtari”	15
Mësimi IV	“Biri plangprishës merr një mësim”	19
Mësimi V	“Pali dhe Sila shkojnë në Filipi”	23

**Bashkësia e Ungjillizimit të Fëmijëve (B.U.F.)  
Child Evangelism Fellowship (C.E.F.)  
Kutia Postare 4  
Durrës  
Albania**

## PARATHËNIE

Këto mësimë janë krijuar për t'u përdorur në Klubet 5-Ditore, por gjithashtu mësuesit do t'i gjejnë ato të dobishme edhe në situata të tjera. Synimi është t'u mësohet fëmijëve për nevojën e tyre të shpëtimit dhe sesi mund të plotësohet kjo nevojë në Zotin Jezus Krisht.

Unë e vlerësoj punën e Didi Greiner për të ilustruar këto mësimë në mënyrë të efektshme dhe tërheqëse. Jam shumë mirënjohës për punën e bërë nga Kay Denham (BUF i Zelandës së Re).

Uroj që Perëndia të përdorë këto mësimë për të bërë që shumë fëmijë të përjetojnë shpëtimin e Tij të mrekullueshëm. *“Kështu është vullneti i Atit tuaj që është në qiej, që asnjë nga këta të vegjël të mos humbasë” (Mateu 18:14).*

Jennifer Gowan  
Literatura e BUF  
Departamenti i Botimit

## UDHËZIME PËR MËSUESIN

### LUTJA.

Lutuni për fëmijët. Asnjë punë shpirtërore nuk mund të kryhet në qoftë se në zemrën dhe jetën e tyre nuk vepron Perëndia. Lutuni që ju të jepni çdo mësim me fuqinë e Shpirtit të Shenjtë. Ky është sekret i ungjillëzimit të efektshëm.

### MËSIMI I VARGJEVE PËRMENDSH.

Sugjerojmë që kur këto mësim të jepen në pesë ditë njëra pas tjetrës, të jenë mësuar vetëm tri vargje përmendsh. Është më mirë që fëmijët të mësojnë mirë tri vargje, sesa të mësojnë pesë në mënyrë të pjesshme. Kështu shpjegohet pse vargjet përmendsh janë përsëritur në dy nga mësimet. Sugjerohen dy vargje të tjera Biblike në qoftë se i jepni ato si mësim individuale.

### PËRGATITJA.

Shkrimi i detajuar është bërë për të ndihmuar mësuesit, por nuk duhet të zëvendësojë përgatitjen e kujdesshme dhe lutjen. Studioni pasazhet në Fjalën e Perëndisë para se të studioni dorëshkrimin. Përpquni të njihni çdo mësim aq mirë sa të jeni në gjendje ta jepni atë pa shënime, ose në më të shumtën, me fare pak shënime. Mbani mend, është pothuajse e pamundur të përdorni shënime në situatat në natyrë të Klubit 5 Ditor. Gjithashtu, praktikoni përdorimin e figurave para se t'u shpjegoni mësimin fëmijëve. Brenda kapakut të prapmë të figurave ka një hartë; mund të vini në dukje se ku ndodhën ngjarjet: Mësimi I - në Goshen; Mësimi II - në rrugën për Kanaan; Mësimi III - në Jeriko; Mësimi IV - në Izrael; Mësimi V - në Filipi.

### TË QENËT NË DISPOZICION TË FËMIJËVE.

Mund të ketë fëmijë që dëshirojnë me zemër të shpëtohen por janë të pasigurt sesi mund ta bëjnë këtë. Mund të ketë fëmijë që kanë pyetje për atë që shpjegoni. Në një çast gjatë çdo programi tregojuni fëmijëve se ju jeni në dispozicion të tyre për të biseduar me ta pas takimit. Bëjeni të qartë se ku do të ndodheni. Tregoni kujdes që fëmijët të mos krijojnë përshtypjen se duhet të qëndrojnë pas takimit për t'u shpëtuar. Ata mund të besojnë në Krisht kudo që të ndodhen, kurdo, dhe pa praninë e një këshilluesi.

Mund t'u thoni fëmijëve që jeni në dispozicion të tyre për këshillim:

- gjatë takimit kur të bëni lajmërimet;
- ose pas mësimet të vargut përmendsh që flet për shpëtimin individual nga mëkati;
- ose gjatë mësimet të Biblës, preferohet në fillim;
- ose në një kohë tjetër të përshtatshme gjatë programit.

### Shembull për atë që mund të thuhet:

“Nëse dëshironi që Zoti Jezus t’ju falë mëkatet por ende nuk jeni i sigurt se çfarë të bëni, unë do të isha i gëzuar që të bisedoja me ju për këtë dhe t’ju ndihmoj. Pasi të ketë mbaruar takimi, shkoni e uluni atje poshtë pemës. Në këtë mënyrë do të kuptoj se ju doni të bisedoni me mua. Unë do të vij dhe do t’ju shpjegoj si mund t’i kërkonte Zotit Jezus Krisht që të jetë Shpëtimtari juaj”.

Ashtu siç ka shpesh fëmijë që besojnë vetë tek Zoti Jezus Krisht si Shpëtimtari i tyre (pa u këshilluar personalisht), do ishte mirë të thoshit diçka të tillë nga fundi i javës së Klubit të Pesë Ditëve: “Nëse besoni në Zotin Jezus dhe unë nuk e di këtë gjë, atëherë më tregoni pas takimit me qëllim që t’ju ndihmoj. Unë do të qëndroj atje në anë të atij stoli (apo në një vend tjetër). Ejani dhe më thoni: ‘Desha që ju të dinit se unë i kërkoja Jezusit të më shpëtojë’.”

Kjo do ju bënte të mundur që ju të regjistronit këtë fëmijë në programin tuaj ‘Më ndiq’ dhe të jeni në gjendje ta ndihmoni atë në fushën e sigurisë dhe të rritjes së krishterë.

# Mësimi I

## GJON PAGËZORI TREGON RRUGËN

Theks të veçantë: Jezus Krishti shpëton nga GJYKIMI

Vargu Përmendsh: *“Në këtë është shfaqur dashuria e Perëndisë ndaj nesh, se Perëndia dërgoi Birin e tij të vetëmlindurin në qe ne të rrojmë nëpërmjet tij” (I Gjon 4:9)*

Shkrimet: *Gjoni 1:19-36; Lluka 3:1-3; Mateu 3:1-6; Eksodi 12*

### Mësim

“Ja ku është ai përsëri” - thirri dikush nga rruga. “Gjon Pagëzori po predikon. Ai është pranë lumit Jordan; ejani dhe dëgjojeni!”

Ndërsa përhapej lajmi, njerëzit dilnin shpejt nga shtëpitë dhe punishtet e tyre duke folur të ngazëllyer dhe nxitonin drejt lumit. Ky lumë, Lumi Jordan ndodhet në Palestinë. Gjoni, ky predikues i famshëm, predikoi rreth dy mijë vjet më parë.

### Piktura I-1

Pas pak njerëzit mundën të dëgjonin zërin e lartë të Gjonit. “Pendohuni!” - u thërriste ai atyre. “Largohuni nga mëkati, nëse doni t’i shpëtoni gjykimit të Perëndisë”.

Ç’paraqitje të çuditshme që kishte, i veshur me lëkurë deveje, me një rrip lëkure. Turma dëgjonte tek ai predikonte. Shumë besonin se ç’thoshte Gjon dhe ata ishin pagëzuar në lumë për të treguar që po hiqnin dorë nga fajet që kishin bërë. Kishin ardhur njerëz të ndryshëm - të rinj e të moshuar, të varfër e të pasur, udhëheqës e njerëz të zakonshëm. Ata vinin prej aty afër e nga larg, deri edhe nga qyteti i Jeruzalemit për të dëgjuar predikimin e Gjonit. Disa pyesnin se kush ishte Gjon në të vërtetë.

“A është Gjon Krishti, Ai që Perëndia premtoi se do dërgonte një ditë?” - mendonin ata. “Krishti” ishte emri i dhënë Njeriut të Veçantë që Perëndia kishte premtuar se do dërgonte si Shpëtimtar. “Jo” - tha Gjon, “Unë nuk jam Krishti; unë nuk jam Shpëtimtari i premtuar. Dikush do të vijë, dikush që është kaq i madh sa unë nuk jam i mirë as sa për t’u përlulur për ta ndihmuar që të heqë këpucët. Ai është Krishti, jo unë”. Gjon kishte një detyrë të veçantë për të kryer: Perëndia e dërgoi atë t’u tregonte njerëzve që të bëheshin gati sepse Biri i Perëndisë, Krishti ishte në rrugën e Tij.

### Piktura I-2

Një ditë Gjoni u kthye dhe tregoi me gisht Dikë dhe tha: “*Ja qengji i Perëndisë, që heq mëkatën e botës!*” (Gjoni 1:29). Njerëzit panë andej nga tregonte Gjoni. Atje qëndronte Zoti Jezus Krisht!

Gjoni po u tregonte atyre se Krishti, Shpëtimtari i premtuar kishte ardhur. Në Dhjatën e Vjetër në Bibël Perëndia u kishte thënë njerëzve të Tij shumë gjëra për këtë Njeri të Veçantë të cilin Ai kishte premtuar se do të dërgonte. Për qindra vjet, njerëzit e Perëndisë, Izraelitët, pritën ardhjen e Tij. Tani Gjoni po rrëfente se Ai kishte ardhur! Gjoni e quajti Atë “*Qengji i Perëndisë*”. Këto fjalë “*Qengji i Perëndisë*” duhet t’u kenë kujtuar atyre që dëgjonin Gjonin diçka që kishte ndodhur shumë vjet më parë. Le të dëgjojmë historinë që ndodhi në atë kohë. Do të na ndihmojë të kuptojmë atë që Gjoni tha se Zoti Jezus do të bënte.

### **Piktura I-3**

Populli i Perëndisë, Izraelitët, jetonin në tokën e Egjiptit. Në fillim ata trajtoheshin mirë. Por, ndërsa vitet kalonin, Egjiptianët filluan të frikësoheshin prej tyre. Kishte gjithnjë e më shumë Izraelitë; kështu që Egjiptianët i shndërruan ata në skllëvër të tyre. Ata i detyruan ata të punonin shumë rëndë dhe i trajtonin ata mizorisht. Ata i përdorën për të ndërtuar piramidat e Egjiptit; shumë Izraelitë vdiqën gjatë punës së rëndë që duhet të bënin. Megjithatë Egjiptianët e ndjenin se kishte shumë Izraelitë. Ata madje u përpoqën të vrisnin gjithë bebet meshkuj të Izraelitëve.

Populli i Perëndisë dëshironte të shpëtohej. Perëndia e kuptoi nevojën e tyre. Ai bëri një plan për t’i çliruar ata me qëllim që të mund të ktheheshin në tokën e tyre. Ai u dha Izraelitëve një udhëheqës, Moisiun; Ai e dërgoi atë të fliste me Faraonin, Mbretin e Egjiptit. Moisiu i kërkoi Faraonit të çlironte popullin e tij, por Faraoni refuzoi: ai nuk donte të humbte skllëvërit e tij!

Perëndia tregoi fuqinë e Tij duke shkaktuar fatkeqësi të mëdha e të tmerrshme Egjiptit. Por Faraoni kokëfortë përsëri refuzoi të linte të lirë popullin e Perëndisë. Shumë herë Moisiu dhe vëllai i tij Aaroni shkuan të takoheshin me Faraonin për ta paralajmëruar atë për ndëshkimin e Perëndisë. Por ata nuk mund t’i kthenin mendjen këtij njeriu mizor; ai gjithnjë thoshte: “Jo, nuk do t’ju lë të ikni!”

### **Piktura I-4**

Atëherë Perëndia dërgoi Moisiun dhe Aaronin tek Faraoni me një paralajmërim të fundit: “Ja se ç’thotë Zoti: ‘Do të kaloj përmes Egjiptit. Të gjithë të parëlindurit e çdo familjeje Egjiptiane do të vdesin - nga i parëlinduri i Faraonit, tek të parëlindurit e çdo familjeje të pasur e të varfër. Do ketë vdekje edhe ndër kafshët e Egjiptianëve. Do të ketë një britmë të madhe në gjithë vendin, që nuk është dëgjuar kurrë më parë dhe që nuk do të dëgjohet asnjëherë tjetër.’” (Shihni *Eksodi 11:4-6*)

Moisiu vazhdoi duke thënë: “Dhe tërë këta shërbëtorët e tu do të zbresin tek unë dhe do të përkulen para meje duke thënë: ‘Nisu, ti dhe populli yt që të ndjek nga pas!’ Mbas kësaj unë do të nisem”. (Eksodi 11:8)

Dhe Moisiu u largua nga Faraoni me zemërim. Faraoni i lig përsëri refuzoi të linte të lirë popullin e Perëndisë. Atij i kishin dhënë një paralajmërim për vdekje, por nuk donte të dëgjonte.

Ndoshta dhe ju jeni si ai? Ka një varg paralajmërues, si ky në Bibël, për ne. Perëndia thotë: “Sepse paga e mëkatit është vdekja” (Romakëve 6:23). Ju e dini se në qoftë se dikush punon në një punë, në fund të javës ose të muajit ai paguhet për punën që ka kryer. Kjo quhet marrje e pagës. Bibla thotë se në qoftë se ju mëkatoni, ju do të fitoni një pagë, pagën e vdekjes. Kjo do të thotë se fryma, ajo pjesë e juaja që do të jetojë përgjithmonë, do të jetë i ndarë prej Perëndisë. Kjo do të thotë që ju nuk mund të jetoni me Perëndinë. Ky është me të vërtetë një dënim i tmerrshëm; por duhet të ndodhë kështu sepse Perëndia dhe mëkati nuk mund të qëndrojnë së bashku.

Ç’keni bërë që të meritoni këtë dënim? Ju mëkatoni! Mëkati është mosbindje ndaj Perëndisë. Bibla thotë se të gjithë kanë mëkatuar: “Sepse të gjithë mëkatuan dhe u privuan nga lavdia e Perëndisë” (Romakëve 3:23) Kjo do të thotë se ju keni mëkatuar. Kur mendoni për një çast për këtë gjë, e dini se është e vërtetë. Mund të mendoni për ato raste kur keni ndjerë zemërim, urrejtje për dikë: “E urrej atë” - keni menduar me vete. Zoti Jezus thotë se kur keni të tilla mendime për dikë, ju nuk i bindeni urdhrit të Perëndisë që thotë: “Duaje të afërmin tënd siç do veten”. Mendimet e liga, zemërimi, fjalët me inat janë mëkate dhe e zemërojnë Perëndinë. Ai është kaq i pastër dhe i mirë dhe i drejtë sa duhet ta ndëshkojë çdo mëkat. Bibla na paralajmëron se dënimi është ndarje nga Perëndia. Dëgjoni paralajmërimet e Perëndisë; mos jini si Faraoni.

### **Piktura I-5**

Kur Moisiu dhe Aaroni u larguan nga Faraoni, duhet të përgatisnin Izraelitët për atë që do të ndodhte. Ata mbledhën njerëzit së bashku dhe u shpjeguan se ç’duhet të bënin: “Dëgjoni! Ditën e dhjetë të këtij muaji, çdo burrë të marrë për vete një qengj. Duhet të jetë një qengj mashkull, motak dhe pa të meta”. (Shihni Eksodi 12:3-5)

Ky qengj na bën të mendojmë për Zotin Jezus Krisht. Gjon Pagëzori e quajti Atë “Qengji i Perëndisë” Jezusi ishte i përkryer. Ai nuk kishte një zemër mëkatore që do ta bënte të mos i bindej Perëndisë; Ai lindi i pastër dhe pa mëkat, i vetmi njeri i lindur ndonjëherë kështu. Kur u rrit, Ai asnjëherë nuk mashtroi; kurrë nuk gënjeu; kurrë nuk i ktheu fjalën së ëmës kur ajo i kërkonte të bënte diçka; Ai kurrë nuk mëkatoi. Prandaj qengji për të cilin foli Moisiu na kujton Zotin Jezus Krisht.

Moisiu vazhdoi të udhëzonte njerëzit: “Do ta ruani deri në ditën e katërbëdhjetë të këtij muaji dhe tërë asambleja e popullit të Izraelit do ta

therë atë në të ngrysur. Pastaj do të marrin nga ai gjak dhe do ta vënë mbi dy shtalkat dhe mbi arkitraun e shtëpive ku do ta hanë”. (Shihni Eksodi 12:6,7)

Qengji i Perëndisë, Zoti Jezus Krisht vdiq gjithashtu. Nuk kishte rrugë tjetër që njerëzit që meritonin të ishin të ndarë përjetë nga Perëndia, të mund të shpëtoheshin nga ai dënim i tmerrshëm. Ai, i vetmi Njeri që nuk mëkatoi kurrë, mori dënimin që ne meritojmë nga Perëndia. Jezusi dha gjakun e Tij të çmuar me qëllim që njerëzit si ju e si unë të mund të jemi të sigurt. Kishte vetëm një rrugë që Izraelitët të ishin të sigurt, kur të vinte Zoti dhe të sillte vdekje në gjithë vendin për shkak të mëkateve të rënda të Egjiptianëve. Pra, ka vetëm një njeri që mund t’ju shpëtojë - Zoti Jezus Krisht.

Në ditën e 14-të të muajit çdo familje veptoi ashtu siç kishte thënë Moisiu. Qengjat u therën. Ashtu siç u kishte thënë Perëndia nëpërmjet Moisiut të gjithë morën nga gjaku dhe e vunë mbi dy shtalkat dhe përmbi derën. Gjaku nuk duhej të ruhej në legen; ai duhej vënë mbi shtyllat e derës. Kur Zoti të shihte gjakun, Ai do të kalonte mbi atë shtëpi dhe të gjithë njerëzit e asaj shtëpie do të ishin të sigurt.

Është njësoj edhe me Qengjin e Perëndisë. Ai vdiq, por kjo nuk do të thotë që çdokush në botë është i sigurt nga dënimi për mëkatin. Në qoftë se dëshironi të jeni të sigurt, ju duhet të besoni individualisht në Zotin Jezus Krisht për t’ju shpëtuar; duhet të keni besim tek Ai si Njeriu që vdiq dhe dha gjakun e Tij të çmuar për ju. Qengji u dënua, ndërsa Izraelitët jo.

Këtë bëri edhe Jezusi për ne duke vdekur mbi kryq. Ashtu si Izraelitët duhej të siguroheshin që gjaku i qengjit të ishte mbi shtyllat e derës, edhe ju duhet të jeni të sigurt që të varenit prej Zotit Jezus Krisht për t’u shpëtuar.

Brenda shtëpive çdo familje e poqi qengjin dhe hëngri ushqimin. Të gjithë ishin veshur gati për udhëtim. Ata nuk duhej të shqetësoheshin për gjykimin e Perëndisë sepse Perëndia kishte thënë: *“Kur unë të shoh gjakun do të kaloj tutje”* (Eksodi 12:13).

## **Piktura I-6**

Atë mbrëmje të gjitha familjet Izraelite ishte në pritje të asaj që do ndodhte siç kishte thënë Perëndia. Në mesnatë, Zoti kaloi në gjithë tokën e Egjiptit. Në çdo shtëpi ku nuk kishte gjak mbi shtalkat e dyerve, të parëlindurit vdiqën. Një britmë e tmerrshme u dëgjua nga pallati; princi i kurorës kishte vdekur. E njëjta britmë u ngrit edhe nga shtëpitë e tjera Egjiptiane kur zbulonin vdekjen e bijve të parëlindur. Sa trishtim! Ç’vajtime!

Oh, mos u bëni si ata njerëz. Mos jini një djalë ose vajzë që nuk beson në Zotin Jezus; Ai dha gjakun e Tij dhe vdiq për mëkatarët. Në qoftë se do të vazhdoni me mosbindje dhe do të refuzoni të besoni në Të, ju do të mbeteni përgjithmonë të ndarë nga Perëndia. Mos u bëni si këta njerëz që nuk patën gjakun e qengjit mbi shtalkat e dyerve të tyre.

Por në çdo shtëpi ku gjaku ishte vënë, nuk pati vdekje. Ata ishin të gjithë të sigurt, ashtu siç kishte premtuar Perëndia. Bëni ç’është e mundur që të jeni si



këta njerëz. Mos mendoni se duke shkuar në kishë, duke thënë lutje ose duke u përpjekur të jeni të mirë mund t'ju bëjë të sigurt. Këto nuk mund ta bëjnë një gjë të tillë. Është mirë të shkoni në kishë, të luteni, të silleni sa më mirë që mundeni, por vetëm Qengji i Perëndisë, Zoti Jezus Krisht mund t'ju mbajë të sigurt nga gjykimi. Bibla thotë: *“Tani pra nuk ka asnjë dënim (ose gjykim) për ata që janë në Krishtin Jezus (Romakëve 8:11).*

Kjo do të thotë që në qoftë se vareni prej Jezus Krishtit, qengjit të Perëndisë, ju do të jeni të sigurt nga gjykimi i Perëndisë, ashtu si ishin Izraelitët.

Egjiptianët po qanin e vajtonin. Faraoni ishte zemërthyer. Gjatë natës ai thirri Moisiun dhe Aaronin dhe urdhëroi: “Çohuni dhe largohuni nga mesi i popullit tim, ju dhe bijtë e Izraelit; dhe shkoni t'i shërbeni Zotit siç e keni thënë. Merrni me vete kopetë e bagëtive të imta dhe të trasha dhe shkoni!” (Eksodi 12:31,32)

### **Piktura I-7**

Moisiu nuk priti t'i thoshin dy herë. Ai dhe populli i tij ishin gati. Në gjithë tokën e Egjiptit Egjiptianët u kërkonin Izraelitëve: “Largohuni para se të vdesim të gjithë ne!” Izraelitët u kërkuan Egjiptianëve rroba e xhevahire dhe ata ua dhanë me gëzim. Ata u dorëzuan byzylykë ari dhe argjendi, vathë dhe zbukurime për veshët dhe veshjet më fine. Kjo ishte mënyra e Perëndisë për Egjiptianët që të shpërblenin Izraelitët për gjithë vitet e punës së rëndë. “Ja merrini të gjitha” - i nxitnin ata. “Vetëm largohuni! Ne nuk ndjehemi të sigurt derisa ju të gjithë të jeni larg prej këtej”.

Turma e madhe e popullit të Perëndisë u vu në lëvizje. Ata ishin të lirë më në fund. Ata kishin qenë të sigurt gjatë natës më të frikshme që Egjipti kishte përjetuar ndonjëherë. Gjaku i qengjit i kishte ruajtur ata.

### **Piktura I-8**

A e kuptoni tani pse Gjon Pagëzori tha: *“Ja, Qengji i Perëndisë, që heq mëkatin e botës?”* Ai po tregonte nga Jezus Krishti, Biri i Perëndisë. Ai kishte ardhur për të vdekur me qëllim që të gjithë ata që besojnë në Të të jenë të sigurt në ditën kur Perëndia të ndëshkojë mëkatin. Bibla thotë: *“Në këtë është shfaqur dashuria e Perëndisë ndaj nesh, se Perëndia dërgoi Birin e tij të vetëmlindurin në botë që ne të rrojmë nëpërmjet tij” (I Gjon 4:9).*

Ndoshta e ndjeni në shpirt se nuk jeni të sigurt, por dëshironi të jeni të tillë. A keni dëshirë që të hiqni dorë nga ato gjëra që nuk e gëzojnë Perëndinë dhe të besoni vetëm në Zotin Jezus Krisht për t'ju ruajtur nga pasiguria? A besoni në Të tani? Thojini: “Zoti Jezus, Qengji i Perëndisë, Të falemnderit që vdiqe për të hequr mëkatin tim. Të falemnderit që dhe gjakun Tënd të çmuar për mua. Më fal që kam qenë kaq i keq. Unë besoj në Ty tani si i Vetmi Njeri që mund të heqë mëkatin tim dhe të më mbajë të sigurt nga gjykimi i Perëndisë”. Nëse besoni në Të, Bibla premtan se *“nuk ka asnjë dënim (ose gjykim) për ata që janë në Krishtin Jezus” (Romakëve 8:11).*

## Mësimi II

# NIKODEMI DËGJON NJË HISTORI

Theks të veçantë: Ju duhet të BESONI në Jezus Krisht që të shpëtoni

Vargu Përmendesh: Në klubin 5-ditor përsëritni / *Gjon 4:9*  
Në një takim të vetëm jepni: *“Duhet të lindni përsëri”*  
(*Gjoni 3:7*)

Shkrimet: *Gjoni 3:1-16; Numrat 21:4-9*

### Mësim

“Sh ...”. Ishte errësirë dhe qetësi. Një njeri ecte shpejt nëpër rrugët e errta të Jeruzalemit. Ishte Nikodemi, një nga udhëheqësit fetarë. Ku po shkonte ai? Ai kishte dëgjuar për gjëra të çuditshme e të mrekullueshme që kishin ndodhur në atë qytet. Njerëzit flisnin për Jezusin e Nazaretit që bënte gjëra që askush tjetër nuk mund t'i bënte. Nikodemi ishte i sigurt që Jezusi ishte dërguar nga Perëndia, por ai donte të dinte më shumë.

Mundet që edhe ju dëshironi të dini më shumë për Zotin Jezus dhe sesi Ai mund të falë mëkatet tuaja. Mundet që ju nuk i keni kërkuar kurrë Zotit Jezus Krisht të jetë Shpëtimtari juaj dhe tani ju me të vërtetë dëshironi që Ai të falë mëkatet tuaja, por nuk jeni të sigurt se çfarë të bëni. Do të isha i gëzuar të bisedoja me ju pas takimit dhe t'ju tregoja nga Bibla se çfarë dëshiron të bëjë Zoti Jezus dhe se ç'duhet të bëni ju. Nëse do të donit të flisnit me mua rreth kësaj çështjeje shumë të rëndësishme, unë do të qëndroj poshtë asaj peme (ose caktoni një vend tjetër), pasi të ketë mbaruar takimi. Mund të vini tek unë dhe do ta kuptoj se ju dëshironi të flisni me mua sesi Jezus Krishti mund të falë mëkatet tuaja.

Po, Nikodemi kishte pyetje. Ai ndaloi në një shtëpi dhe kërkoi të fliste me Vizitorin e tyre. A e merrni me mend se kush ishte Vizitori? Po ishte Zoti Jezus, Biri i Perëndisë.

### Piktura II-1

Ai dhe Nikodemi folën gjatë atë natë. Zoti Jezus tha: *“Në qoftë se një nuk ka rilindur, nuk mund ta shohë mbretërinë e Perëndisë”*. Për Nikodemin nuk mjaftonte të njihnte Perëndinë; ai duhej të fillonte një jetë të re. Por Nikodemi nuk mund ta bënte këtë vetëm; vetëm Perëndia ishte në gjendje ta ndryshonte atë në mënyrë që ai të fillonte të jetonte për Perëndinë; pastaj Ai do të ishte Mbret në jetën e tij.

Ky njeri i zgjuar fetar u vu në mëdyshje: “A duhet që një njeri të kthehet në fëmijë përsëri për të filluar një jetë të re?” Nikodemi nuk e kuptonte si mund të ndodhte kjo. Prandaj Zoti Jezus tregoi një histori që kishte ndodhur shumë vite më parë të cilën e dinte edhe Nikodemi. Patjetër që kjo do ta ndihmonte atë të kuptonte.

### **Piktura II-2**

Shumë kohë më parë, populli i Perëndisë, Izraelitët u larguan nga Egjipti ku kishin qenë skllëvër.

*(Ju e mbani mend nga mësimi i kaluar si Izraelitët therën qengjat e vegjël dhe Perëndia i mbrojti ata që të liroheshin).*

Ata po shkonin drejt një toke të re.

*(Tregoni hartën brenda kapakut të prapmë dhe tregoni drejtimin që morën izraelitët nga Egjipti për në Kanaan).*

Ndërsa udhëtonin ata flisnin se sa i mirë kishte qenë Perëndia. Ai kishte treguar se ishte i madh dhe i fuqishëm duke i nxjerrë ata jashtë Egjiptit. Ata ishin shumë të gëzuar që i përkitnin të vetmit Perëndi të vërtetë. Ata nuk adhuronin perëndi të rreme që nuk mund të bënin asgjë; Perëndia i tyre ishte i fuqishëm dhe i mirë.

Për shumë vite kjo turmë e madhe njerëzish eci nëpër shkretëtirë. Një ditë ata mbërritën në kufijtë e tokës së Edomit. Nëse do të udhëtonin përmes Edomit ata do të arrinin në tokën e tyre të re shumë më shpejt. Por Mbreti i Edomit refuzoi t'i lejonte ata të kalonin përmes tokës së tij. Kështu ata duhet të merrnin rrugën e gjatë rreth e rrotull. Udhëtimi dukej i pafund! Ata u shkurajuan shumë dhe harruan atë që Perëndia kishte bërë për ta. “Pse na nxore nga Egjipti që të vdesim në këtë shkretëtirë? Këtu nuk ka as bukë as ujë, na vjen neveri për këtë ushqim të keq” - u ankuan ata. *(Shihni Numrat 21:5)*

### **Piktura II-3**

Por ata kishin ushqim dhe ujë. Perëndia kishte qenë shumë i mirë me ta. Çdo mëngjes kur ata ngriheshin ata shikonin se Perëndia u kishte dhuruar atyre bukë nga qielli; ata i quanin copëzat e rrumbullakëta e të holla mbi tokë “manna” Ata kishin manna çdo ditë. Jo vetëm kaq, por Perëndia ishte në gjendje të bënte ujin të dilte nga shkëmbi kur ata kishin etje. Por ata tani po ankoheshin kundër Perëndisë.

A nuk jemi edhe ne si ata? Perëndia ka qenë shumë i mirë me ne. Ne kemi ushqim, miq dhe shtëpi. Ne jemi të fortë dhe të shëndetshëm. Perëndia jep dritën e diellit dhe shiun. Edhe të qenët gjallë sot është një dhuratë e Perëndisë. Ai është shumë i mirë dhe i dashur. Por ne jemi tamam si ata njerëz shumë kohë më parë; ne ngremë krye kundër Perëndisë. Ky Perëndi urdhëron që Ai duhet të jetë Perëndia juaj dhe të ketë vend të parë në jetën tuaj. Bibla thotë: “*Ta doni Zotin Perëndi me gjithë zemër*” por ne nuk e duam, apo jo? Ju luani çdo ditë, shkoni në shkollë, hani e flini por nuk mendoni

shpesh për Perëndinë. Miqtë tuaj, lodrat tuaja, programet televizive janë më të rëndësishëm për ju sesa Perëndia.

Bibla thotë se ne nuk duhet të harrojmë mirësinë e Perëndisë e të qahemi dhe të ankojemi. A thoni gjëra të tilla: “Nuk e pëlqej mësuesin që më thotë se ç’duhet të bëj. Nuk kam qejf të laj pjatat për Mamin. Nuk dua të dëgjoj atë që Perëndia thotë të bëjmë në Bibël. Unë dua të bëj vetëm atë që kam qejf.” A jeni një qaraman ose ankues? Kur u bëni të tjerëve gjëra të tilla ju nuk i bindeni Perëndisë. Është sikur ju t’i tundnit grushtin Perëndisë duke i thënë: “Nuk dua që Ti të sundosh jetën time. Nuk e dua atë që më ke dhënë”.

Mundet që ju të thoni: “Nuk e bëj këtë shpesh.” Është si një krisje e vazos. Në qoftë se ka pësuar vetëm një të çarë, është prishur e gjitha. Të mos i bindesh Perëndisë për një gjë është njësoj sikur të mos i bindesh për të gjitha. Ju luftoni kundër urdhrave të Perëndisë; ju nuk i bindeni Atij ashtu si ata njerëz shumë kohë më parë.

#### **Piktura II-4**

Papritur një klithmë u përhap në kamp, një klithmë e dhimbshme paniku! Çdo ditë gjarpërinj helmues rrëshqitnin përmes njerëzve duke i kafshuara ata. Dhimbja djegëse ishte e tmerrshme. Njerëzit po vdisnin. Perëndia kishte dërguar gjarpërinjtë për të ndëshkuar njerëzit për ankesat dhe mosbindjen e tyre, Perëndia është i dashur dhe i mirë, por Ai është gjithashtu i pastër dhe i drejtë. Kur njerëzit nuk i binden dhe ngrenë krye kundër Tij, Ai duhet të ndëshkojë mosbindjen e tyre. Tani këta njerëz ishin në rrezik vdekjeje për shkak të mëkatit të tyre.

A e dinit se edhe ju jeni në të njëjtin rrezik? Oh, jo ju nuk jeni kafshuar nga një gjarpër; por ju keni treguar mosbindje ndaj Perëndisë dhe meritoni dënimin e Tij. Perëndia na thotë në Bibël se kush është ky dënim. Ai thotë: *“Shpirti që mëkaton ka për të vdekur.” (Ezekieli 18:4)*. Kjo nuk do të thotë se ju do të vdisni dhe do të varroseni. Do të thotë që do të jeni larg prej Perëndisë për jetë të jetëve; do të thotë të jeni të ndarë nga Perëndia. Ky është ndëshkimi për mosbindjen ndaj një Perëndie të dashur, të pastër dhe të gjithëfuqishëm; e ne të gjithë e meritojmë atë.

Njerëzit në shkretëtirë e dinin se ata e meritonin atë që po ndodhte. Ata e kuptuan pse ata gjarpërinj vdekjeprurës ndodheshin gjithkund në kampin e tyre. Shumë të hidhëruar ata shkuan te Moisiu, udhëheqësi i tyre dhe i kërkuan: “Kemi mëkatur sepse kemi folur kundër Zotit dhe kundër teje; lutu Zotit që të largojë nga ne këta gjarpërinj.” (*Numrat 21:7*)

#### **Piktura II-5**

Udhëheqësi i tyre besnik shkoi të fliste me Zotin Perëndi për popullin e tij. Ai e dinte se në qoftë se Perëndia do t’i linte ata të vdisnin, kjo ishte ç’ka ata meritonin. Askush nuk mund të thoshte: “Nuk është e drejtë!”

Është njësoj edhe me ne. Në qoftë se Perëndia do të dënonte secilin prej nesh përgjithmonë, askush nuk do të mund të thoshte: “Unë nuk e meritoja këtë.” Ne tregojmë kaq mosbindje ndaj Perëndisë sa të gjithë meritojmë dënimin e Tij, ashtu si populli për të cilin Moisiu po lutej.

Perëndia e dëgjoi Moisiun. Ai i dha atij udhëzime tepër të çuditshme: “Bëj një gjarpër bronxi dhe vëre mbi një shtizë; kështu çdo njeri që do të kafshohet prej tij dhe do ta shikojë ka për të jetuar.” (*Shihni Numrat 21:8*)

A nuk ishte i mirë Perëndia që u tregoi këtyre njerëzve ankues një mënyrë si të shpëtonin nga vdekja? Por mënyra që Ai na ka dhënë neve për të na shpëtuar nga mëkati ynë është tepër më e mrekullueshme.

Zoti Jezus i tha Nikodemit se ashtu si gjarpri i bronzit ishte vënë lart mbi shtizë, edhe Ai, Zoti Jezus duhej të vihej lart mbi një kryq. Ai kurrë nuk mëkatoi, prandaj nuk meritonte asnjë dënim. Por Perëndia mori mëkatet tona dhe i vuri ato mbi Zotin Jezus - *“Ai vetë i barti mëkatet tona në trupin e tij mbi drurin e kryqit” (I Pjetër 2:24)*. Perëndia e dënoi Birin e Tij të dashur sikur Ai të kishte bërë gjithë fajet. Mbani mend, thamë që dënimi për mëkatin është ndarja nga Perëndia. Kur Zoti Jezus vdiq, vuajti tmerrësisht shumë; por vuajtja më e madhe ishte ndarja e përkohshme prej Atit të Tij, Perëndisë. Ai thirri: *“Ati im, Ati im, pse më le!”* Në atë moment Perëndia vuri mbi Të gjithë gjykimin dhe ndëshkimin për mëkatet tona. Dashuria e Perëndisë për ne është aq e madhe sa Ai duhej të jepte birin e Tij të vetëm që të “ngrihej lart” për të vdekur. Pastaj në ditën e tretë Perëndia e ngriti Atë prej të vdekurit. Ai është i gjallë sot dhe jeton në qiell me Perëndinë Atë. Ja përse Zoti Jezus është në gjendje të na thotë neve sot: *“Kthehuni nga unë dhe do të shpëtoni” (Isaia 45:22)*.

A do të thotë kjo që gjithsecili është shpëtuar nga dënimi për mëkatin? Mendoni përsëri për njerëzit në shkretëtirë.

## **Piktura II-6**

Ata duhej të besonin se Perëndia u kishte gjetur një mjet shërimi, vetëm një. Ata duhej të shikonin gjarpurin e bronzit në qoftë se dëshironin të shpëtonin nga vdekja. Në qoftë se dikush do të thoshte: “Nuk më besohet” - ai nuk do jetonte më. Nëse një tjetër do të thoshte: “Nuk mendoj se vetëm duke parë gjarpurin prej bronzi do të më bëjë mirë” - ai do të vdiste gjithashtu. Por shumë njerëz u mblodhën përreth duke e ditur se ata kishin përpara vdekjen. Ata e besuan me të vërtetë atë që u tha Perëndia. Ata shikuan gjarpurin prej bronzi dhe menjëherë u shëruan ashtu siç kishte thënë Perëndia.

Ndodh njësoj edhe me Zotin Jezus. Ai i shpjegoi Nikodemit: *“Kështu duhet të ngrihet lart Biri i njeriut, që kushdo që beson në të të mos humbasë por të ketë jetën e përjetshme” (Gjoni 3:14b-15)*. Ju duhet të besoni se Zoti Jezus u dënua në vendin tuaj dhe të besoni në Të për t’ju shpëtuar nga dënimi që ju meritoni. Nëse ktheheni tek Zoti Jezus me gjithë zemër - kjo do të thotë që besoni vetëm tek Ai - ju nuk do të humbisni përgjithmonë. Ju do të dini se Perëndia ka jetën tuaj dhe kur të vdisni ose kur të vijë përsëri Zoti Jezus ju do të shkoni të jetoni përgjithmonë me Të.

## **Piktura II-7**

Nikodemi dëgjonte me vëmendje shpjegimin e Zotit Jezus se si mund të fillonte jetë të re. Ai u befasua: Nikodemi ishte shumë fetar; ai dinte gjithçka rreth Perëndisë, ai lutej shpesh; por Zoti Jezus po thoshte se këto gjëra nuk e përgatisnin atë të jetonte me Perëndinë. Zoti Jezus tha se ai duhej të lindte përsëri: ai duhej të bëhej një njeri i ri. Ai duhej të besonte tek Zoti Jezus Krisht.

E kuptoni si mund të keni jetë të re? E dini pse Zoti Jezus Krisht është i vetmi njeri që mund t'ju shpëtojë nga mëkati? *“Perëndia dërgoi Birin e tij të vetëmlindurin në botë që ne të rrojmë nëpërmjet tij” (I Gjon 4:9)*

## **Piktura II-8**

Po juve? Sot dëgjuat disa nga gjërat e mrekullueshme që tha Zoti Jezus. Ju e keni kuptuar që ka vetëm një rrugë shpëtimi nga ndarja me Perëndinë. Dëgjoni këto fjalë të mrekullueshme nga Bibla: *“Kthehuni nga unë dhe do të shpëtoni, ju mbarë skaje të tokës. Sepse unë jam Perëndia dhe nuk ka asnjë tjetër” (Isaia 45:22).*

Binduni Perëndisë dhe kthehuni nga Zoti Jezus sot. Tregojini se ju besoni në Të: “Zoti Jezus, unë nuk i jam bindur urdhrave të Tua. Unë e di se e meritoj të dënohem. Por unë besoj se Ti u dënove për mua. Të lutem më shpëto mua tani”. Nëse do të besoni në Të, Ai do t'ju shpëtojë dhe ju do të shihni se Perëndia do t'ju kthejë në një tjetër njeri, një njeri që mund të jetojë për Të.

## Mësimi III

# ZAKEU U GJET NGA SHPËTIMTARIN

Theks të veçantë: Zoti Jezus Krisht erdhi të SHPËTOJË mëkatarët.

Vargu Përmendsh: *“Prandaj edhe mund të shpëtojë plotësisht ata që me anë të Tij i afrohen Perëndisë.” (Hebrenjve 7:25)*

Shkrimet: *Lluka 19:1-10*

### Mësim

#### Piktura III-1

“Shtatëdhjetë, tetëdhjetë, nëntëdhjetë, njëqind ...” Zakeu kishte shumë qejf të numëronte paratë sepse e dinte që do të mbante shumë prej tyre për vete. Ai kishte një detyrë shumë të rëndësishme, të punonte për Romakët që kishin pushtuar tokën e Izraelit. Romakët i detyronin Judenjtë të paguanin shumë taksa. Zakeu përgjigjej për të gjithë njerëzit që mblidhnin këto taksa në qytetin e Jerikosë dhe përreth tij. Ai ishte kryetagrambledhësi. Ai siguronte që qeveria Romake të merrte të gjitha paratë që kërkonte. Por ai sigurohej gjithashtu edhe që të mbante shumë prej tyre për vete.

Ky njeri i pasur, i rëndësishëm jetonte në Jeriko, një qytet i bukur me palma të larta dhe kopshte të bukura. Aty jetonin shumë njerëz të pasur. Jam e sigurt që Zakeu ishte i kënaqur me këtë sepse ata do t'i paguanin qeverisë Romake shumë para dhe kjo do të thoshte edhe shumë para për të!

Zakeu ishte i rëndësishëm, kishte shumë para dhe jetonte në një qytet të bukur. Por diçka nuk shkonte. Ai ishte mashtrues dhe vjedhës. Ai u merrte njerëzve më shumë para se ç'duhej. Ai i mashtronte që të fitonte shumë para për vete. Ai duhet ta ketë ditur urdhrin e Perëndisë: “Mos vidh”, por ai nuk i bindej atij asnjëherë. Kur nuk i bindeni Perëndisë, bëni mëkat. Mëkati ju ndan nga Perëndia prandaj edhe ne jemi shumë larg prej Tij. Bibla thotë: *“por paudhësitë tuaja kanë shkaktuar një ndarje midis jush dhe Perëndisë tuaj, dhe mëkatet tuaja kanë bërë të fshihet fytyra e Tij prej jush, që të mos ju dëgjojë më.” (Isaia 59:2).*

Ky ishte gabimi i Zakeut: ai ishte shumë larg prej Perëndisë; ai kishte humbur në mëkat. Mundet që ju të jeni si ai. Le të mendojmë për atë urdhër: “Mos vidh.”

A i keni marrë ndokujt një laps, një lodër ose një libër? Ai i keni marrë para pa leje Mamit ose Babit për të blerë akullore? Mendoni për ata test (provim) në shkollë ku ju i kopjuat përgjigjen dikujt tjetër. Ti e vodhe përgjigjen. Ju nuk i jeni bindur Perëndisë. Ju i njihni këto faje dhe gjëra të tjera të gabuara në jetën tuaj që ju ndajnë juve nga Perëndia. Ju gjithashtu keni humbur në mëkat, ashtu si Zakeu. Mëkatet tuaja ju ndajnë juve nga Perëndia.

### **Piktura III-2**

Një ditë Zakeu pa të mblidheshin turma njerëzish të entuziazmuar. Në nxehtësinë e diellit njerëzit thërrisnin e bërtitnin, disa shtynin për të hapur rrugën. “Po vjen Jezusi nga Nazareti” - lajmi u shpërnda menjëherë. Shumë njerëz kishin dëgjuar gjëra të ndryshme për Të. Ata flisnin për ato që kishin dëgjuar: “Ai mund t’u kthejë shikimin të verbërve”.

“Po, dhe shpesh kur Ai prek të sëmurët ata shërohen në çast”

“Ai madje i ngriti të vdekurit dhe i bëri të gjallë!”

Ka të ngjarë që shumë pak nga njerëzit e asaj turme e kuptuan se Ai për të cilin po flisnin ishte Biri i Perëndisë. Ai kishte jetuar përjetë me Perëndinë, Atin e Tij në qiell. Ai u bë njeri dhe zbriti mbi tokë. Duke qenë Perëndi, Ai mund të bënte këto gjëra të mrekullueshme. Megjithëse njerëzit nuk e kuptonin këtë ata ishin shumë të ngazëllyer për ardhjen e Tij në qytetin e tyre.

Zakeu e mori vesh që Ai po vinte: “Unë duhet ta shoh këtë njeri.” - mendoi ai. Ndoshta ai kishte dëgjuar se Zoti Jezus ishte mik i tagrambledhësve të cilët çdokush tjetër i urrente. Zakeu nxitoi të bashkohej me turmën, por ai nuk mund të shihte mbi kokat e njerëzve. Ai ishte një burrë i shkurtër. Edhe po të ngrihej mbi majat e gishtave, ai nuk do të kapte asnjë shikim të Zotit Jezus. Padyshim askush nuk ishte i interesuar ta ndihmonte atë. Ai ishte kryetagrambledhësi dhe njerëzit e urrenin.

### **Piktura III-3**

Zakeu duhet të ketë mbetur shumë i zhgënjyer. Ai dëshironte kaq shumë që ta shihte këtë Njeri. Shpejt do të bëhej vonë sepse Jezusi vetëm sa po kalonte nëpër qytet. Pikërisht atëherë Zakeut i lindi një ide. Sapo i erdhi në mend, ai filloi të vraponte poshtë rrugës. Ishte tepër e pazakontë në ato kohë për një njeri të pasur dhe të rëndësishëm që ta shikonin në rrugë duke vrapuar në atë mënyrë. Ç’po mendonte të bënte ai?

Ideja e Zakeut ishte kjo: “Ka një pemë fiku gjatë rrugës ku do të kalonte Jezusi. Në qoftë se ngjitem në të do të shoh më mirë.”

Përfytyroni kryetarin e tagrambledhësve të Jerikos duke dashur të ngjitet mbi një fik!

Ai e arriti pemën shumë shpejt. U kap pas njëres prej degëve dhe u ngjit lart. Ai u kacavir dhe u ul mbi një degë në mes të gjetheve. Tani ishte i sigurt që do të kishte një pamje të mirë kur të kalonte Zoti Jezus Krisht.



### **Piktura III-4**

Zakeu vështronte turmën që po afrohej gjithmonë e më shumë. Po, Zoti Jezus Krisht ishte duke ecur nëpër rrugën e nxehtë dhe të pluhurosur. Pse kishte ardhur Ai në Jeriko? Ai po shkonte në Jeruzalem dhe duhej të kalonte përmes Jerikos për të mbërritur atje. Ai po shkonte në Jeruzalem me një qëllim të veçantë.

Ai, Biri i Perëndisë ishte larguar prej qiellit për të ardhur në botë për të bërë diçka të mrekullueshme për njerëz si Zakeu, si ju e si unë që kanë humbur në mëkat dhe janë shumë larg Perëndisë. Ai ishte i vetmi Njeri që kishte jetuar ndonjëherë mbi tokë dhe kurrë nuk tregoi mosbindje ndaj Perëndisë. Bibla thotë: *“ai nuk njihete mëkat.”* (II Korintasve 5:21) E megjithatë, Ai dha Vetën e Tij për të vdekur mbi kryq dhe mori dënimin që ne meritojmë prej Perëndisë. Ai u dënua sikur të ishte Ai që nuk iu bind Perëndisë. Kur vdiq mbi kryq Ai u nda prej Atit të Tij, Perëndisë. Ç’ndëshkim të tmerrshëm vuajti Ai! Por Ai u ngrit prej të vdekurit dhe është i Vetmi që mund t’ju shpëtojë nga humbja e përjetshme. Ai erdhi të vdiste për të shpëtuar djemtë dhe vajzat e humbur, burrat dhe gratë. Ja përse Ai po shkonte në Jeruzalem dhe po kalonte përmes Jerikosë.

Kishte edhe një arsye që Ai ishte atje. Ai po kërkonte dikë ndërsa ecte gjatë rrugës. Ai dhe turma iu afruan më shumë pemës ku Zakeu ishte ulur në mes të gjetheve. Zakeu ishte i lumtur që kishte mundësi të shikonte.

### **Piktura III-5**

Por turma ndaloi sepse Zoti Jezus ndaloi tamam poshtë fikut. Ai pa lart nga pema dhe thirri: *“Zake, zbrit shpejt poshtë sepse sot duhet të rri në shtëpinë tënde”*. Të gjithë u çuditën! Zakeu u çudit gjithashtu!

Zakeu ishte ai të cilin Zoti Jezus po kërkonte në Jeriko. Ai e donte këtë njeri dhe dëshironte të bënte diçka të mrekullueshme në jetën e tij. Ai dinte gjithçka për Zakeun: Ai dinte emrin e tij; e dinte se ku jetonte; e dinte se ai ndodhej në degën e asaj peme; Ai dinte gjithçka mbi mashtrimet e tij, vjedhjet dhe sesa jopopullor ishte Zakeu. Megjithëse tani ndodhet në qiell, Zoti Jezus kërkon njerëzit. Ai përsëri i thërret njerëzit. A ju thërret edhe juve Ai sot? Oh jo, ju nuk do dëgjoni një zë ashtu si dëgjoni zërin tim. Por Zoti Jezus ju thërret juve nëse ju e dini që keni humbur në mëkat dhe që ajo që keni dëgjuar sot është pikërisht edhe për ju. Thellë në zemrën tuaj ju e dini se Ai ju do; Ai po ju kërkon të shkoni tek Ai me qëllim që ju të mos jeni të humbur më në mëkat. A e dëgjoni ju Atë? Atë ditë, kohë më parë Ai thirri Zakeun.

Burri i vogël u kacavir poshtë pemës. Unë e përfytyroj atë gati duke rënë prej degëve. Për një moment ai qëndronte pranë Atij të cilin dëshironte shumë ta shihte. A kishte të drejtë Zakeu të shkonte kur e thirri Zoti Jezus? Po, kishte! Nëse Zoti Jezus ju thërret juve sot, binduni Atij dhe bëni ç’ju thotë Ai ashtu siç bëri Zakeu.

### **Piktura III-6**

Së bashku Zoti Jezus me Zakeun u nisën drejt shtëpisë së burrit të vogël. Njerëzit e turmës filluan të mërmëritnin e të ankoheshin: “Nuk e di Ai se ç’njeri është Zakeu?”

“E imagjinoni dot si mund të rrihet në shtëpinë e një mashtuesi!”

Por Jezus Krishti, Biri i Perëndisë erdhi në botë për të gjetur dhe shpëtuar njerëz si Zakeu. Ai nuk donte që Zakeu të vazhdonte me mosbindje dhe të humbiste nga Perëndia përgjithmonë. Ai vepron njësoj edhe sot; Ai përsëri shpëton djem dhe vajza të këqij, burra e gra.

Ç’do të thotë fjala “shpëtoj”. Përfytyroni sikur ndodhëni në breg të detit dhe shkoni të notoni. Papritur gjendeni në mes të rrymës që po ju merr me vete dhe ju çon në det të hapur. Nuk mund të bëni asgjë për të shpëtuar veten tuaj sepse rryma është tepër e fortë. Por një roje bregu e shikon se ç’po ndodh dhe nis të notojë. Jo tepër vonë ju ndodhëni përsëri mbi rërë. Ju shpëtuat prej ujit.

Për shkak të mëkatit në jetën tuaj ju jeni në rrezik që të jeni gjithmonë i ndarë prej Perëndisë. Mëkati juaj ju mban larg prej Perëndisë dhe ju nuk mund të bëni dot asgjë për të ndihmuar veten tuaj. Ju keni nevojë për dikë që t’ju shpëtojë nga mëkati. Jezus Krishti është i vetmi Njeri që mund ta bëjë këtë. Ai është i vetmi Shpëtimtar. Atë ditë Ai, Shpëtimtari, po ecte në rrugën drejt shtëpisë së tagrambledhësit.

### **Piktura III-7**

Zakeu ishte kaq i lumtur që Zoti Jezus ndodhej në shtëpinë e tij! Ndoshta ai urdhëroi shërbëtorët e tij që të përgatitnin gjellë të mira për Vizitorin e veçantë. Jam e sigurt se Zoti Jezus foli me Zakeun dhe të tjerët që ndodheshin në shtëpi, por Bibla nuk na e thotë se çfarë tha Ai.

Ndërsa Ai ndodhej akoma atje, diçka e mrekullueshme ndodhi në jetën e Zakeut. Tek dëgjonte Zotin Jezus ai mësoi se Jezusi ishte me të vërtetë Biri i Perëndisë; Ai ishte me të vërtetë Shpëtimtari. Zakeu e pa sa i pastër dhe i përkryer ishte Zoti Jezus dhe sa i lig e mëkatar ishte ai vetë. Ai donte që mëkatet e tij të faleshin; ai donte që jeta e tij të ndryshonte dhe të mos ishte plot me egoizëm, gënjeshtër, mashtrime e vjedhje. Zakeu thjesht besoi në Zotin Jezus Krisht për t’iu falur mëkatet. Ja përse ai ngrit papritur në këmbë. Gjithë bisedat pushuan dhe të gjithë ndenjën në pritje. “Zot, unë po u jap të varfërve gjysmën e pasurisë sime dhe po të kem marrë ndonjë gjë nga ndonjëri me mashtrim, do t’ia kthej katërfish.”

Disa prej njerëzve mbetën gojëhapur nga habia. A ishte e vërtetë? Me të vërtetë ishte Zakeu ai që po fliste? Ç’kishte ndodhur? Zoti Jezus e bëri të qartë menjëherë. Ai i tha Zakeut: *“Sot në këtë shtëpi ka hyrë shpëtimi ... Sepse Biri i Njeriut erdhi të kërkojë dhe të shpëtojë atë që kishte humbur.”* (Lluka 19:10).

Zoti Jezus e shpëtoi Zakeun prej dënimit të përjetshëm për mëkatin e tij. Ai e shpëtoi Zakeun nga mëkati i tmerrshëm që e kishte mbërthyer atë duke e shtyrë të vidhte e të mashtronte. Zakeu kishte shpëtuar nga mëkati. Ai nuk

ishte më i ndarë nga Perëndia. Jeta e tij kishte ndryshuar nga Zoti Jezus Krisht. Ç'ditë e mrekullueshme ishte për Zakeun!

### **Piktura III-8**

Kjo mund të jetë një ditë e mrekullueshme për ju nëse e dini se keni humbur në mëkat dhe doni të hiqni dorë nga gjithçka që e zemëron Perëndinë. Kërkojini tani Zotit Jezus Krisht që të heqë mëkatin tuaj dhe t'ju shpëtoje prej tij. Mund t'i thoni Atij: "I dashur Zoti Jezus, unë kam bërë mëkat dhe faje. Të falemnderit që erdhe të vdesësh në kryq për të më shpëtuar. Unë të lutem që Ti të heqësh mëkatin tim unë besoj plotësisht tek Ty si Shpëtimtari dhe Zoti im."

Nëse ju besoni me të vërtetë tek Ai për t'u shpëtuar, Ai do ta bëjë këtë. Bibla thotë: "*Prandaj edhe mund të shpëtojë plotësisht ata që me anë të tij i afrohen Perëndisë.*" (Hebrenjve 7:25) Ai është në gjendje të ndryshojë jetën tuaj; pastaj si Zakeu ju do të filloni të jetoni për të kënaqur Perëndinë.

## Mësimi IV

### BIRI PLËNGPRISHËS MERR NJË MËSIM

Theks të Veçantë: KTHEHUNI nga mëkati tek Zoti Jezus Krisht .

Vargu Përmendsh: Në klubin e 5 Ditor përsëritni *Hebrenjve 7:25*.

Në një takim të veçantë jepni:

*“Do të ketë gëzim në mes të engjëjve të Perëndisë për një mëkatar të vetëm që pendohet.” (Lluka 15:10).*

Shkrimet: *Lluka 15:1, 10-40*

#### Mësim

Ai eci drejt derës kryesore, me valixhen në dorë dhe pallton në krah; kishte një pamje kryeneçe në fytyrë: “Nuk do të kthehem më kurrë” i bërtiti së ëmës; “Nuk më pëlqen më të rri këtu.” Nëna e Tonit e trishtuar e pa tek largohej.

Një herë Zoti Jezus tregoi një histori për një djalë me emrin Toni ...

#### Piktura IV-1

“Baba, më jep paratë që do të merrja kur ti të vdesësh; i dua tani; nuk dua të pres.”

A ishte më të vërtetë Biri i tij i dashur që po fliste kështu? Sa i trishtuar u ndje babai! Ai i kishte dhënë birit të tij një shtëpi të mirë me shërbyes; i kishte dhënë atij ushqim dhe rroba të mira. Djali i tij më i vogël po i kërkonte paratë e tij që tani; donte të largohej nga shtëpia që të bënte ç’të donte sipas qejfit. Ai baba më bën të mendoj për Perëndinë; Ai është kaq i mirë me ne. Mendoni pak për disa nga gjërat që Ai ju ka dhënë?

*(Diskutoni për dhuratat e Perëndisë)*

Po, çdo gjë të mirë që kemi, është prej Perëndisë së mirë dhe të dashur.

A nuk do mendonit se do ta donim dhe t’i bindeshim një Perëndie kaq të mirë dhe të dashur? Por nuk e bëjmë këtë gjë. Bibla thotë: “*Secili prej nesh ndiqte rrugën e vet.*” (*Isaia 53:6*) Kjo do të thotë se megjithëse Perëndia ka qenë shumë i mirë me ju, ju përsëri ndiqni rrugën tuaj dhe jo atë të Perëndisë. Perëndia e di se ç’është më mirë për ne dhe dëshiron që ne të jemi me të vërtetë të lumtur. Ai na urdhëron në Bibël që t’u bindemi prindërve tanë: Ai na urdhëron që të themi të vërtetën. Babai ju tha: “Eja në shtëpi në orën 6:30 dhe jo më vonë.” Por loja e futbollit ishte shumë e bukur për ta lënë përgjysmë dhe ju u kthyet në shtëpi në orën 7:15. “Në ç’orë të thashë të ktheheshe në shtëpi?” - ju pyeti babai. “Oh, baba, më fal, ora ime ngeli.”

A ndoqët rrugën e Perëndisë apo tuajën? Ju ndoqët rrugën tuaj dhe nuk iu bindët Perëndisë. Pse? Sepse ju keni lindur me një zemër mëkatore që kërkon të veprojë gabim. Askush nuk ju ka mësuar që të mos bindeni në

shtëpi ose të thoni gënjeshtër. E keni të lehtë të ndiqni rrugën tuaj ashtu si edhe ky djalë.

### **Piktura IV-2**

Babai i dha paratë me trishtim dhe menjëherë Biri i tij më i vogël u largua nga shtëpia.

“Do të shkoj në një vend shumë larg prej këtej.” - mendoi ai.

“Do t’ia kaloj për bukuri dhe do të bëj ç’të dua. Do të jetë shumë mirë të mos kem askënd të më thotë se ç’duhet të bëj, se ç’është e drejtë ose e gabuar. Do të kem mundësi t’ia bëj qejfin vetes.”

Babai e pa me trishtim të largohej. Biri i tij i dashur po ndiqte rrugën e tij dhe babai druhej se do të kishte kohë të vështira përpara. E ndoqi me sy derisa nuk mund ta shihte më. Biri i tij kishte ikur. Por djali po mendonte për gjëra të tjera. Ai mezi po priste të kalonte çastet e mira - eksperiencat të reja, shokë të rinj. Ai madje mund të bëhej më i pasur se kurrë! Ai mendonte se ishte në gjendje të organizonte jetën e tij.

### **Piktura IV-3**

Në vendin e largët ai bëri shokë të rinj. Ata shokë ishin shumë të kënaqur ta ndihmonin të harxhonte paratë e tij. Bashkë me ta ai hëngri mirë, pinë shumë dhe bënë shumë faje. Ai ishte larg babait të tij dhe po bënte gjëra që do ta kishin trishtuar atë. Edhe ju jeni si ai. Kur ndiqni rrugën tuaj, ju bëni gjëra që e zemërojnë Perëndinë. Kur thoni “M’u prish ora”, keni thënë një gënjeshtër! Perëndia është i përkryer dhe i mirë; Ai kurrë nuk gënjen dhe i urren gënjeshtër. A mbani mend kur nuk keni qenë në shtëpi në kohën e caktuar? Ju treguat mosbindje ndaj Perëndisë dhe prindërve tuaj. A përdorni emrin e Perëndisë për t’u betuar? Kjo është diçka tjetër që e zemëron Perëndinë sepse Ai ka urdhëruar: *“Nuk duhet ta përdorni për gjëra të kota emrin e Zotit, Perëndisë suaj.”*

Ju i bëni këto gjëra sepse keni ndjekur rrugën tuaj. Mëkati juaj ju mban larg nga Perëndia ashtu siç ndodhej larg shtëpisë ky djalë. Ai mendonte se po ia kalonte për mrekulli.

Megjithatë, shpejt, shumë shpejt, nuk i mbeti asgjë. Paratë ishin prishur dhe shokët e braktisën gjithashtu! Askush nuk do ta ndihmonte. Gjërat shkuan keq e më keq. Në atë vend kishte zi buke dhe nuk kishte shumë ushqim për të ngrënë; ushqimi u bë i shtrenjtë dhe i pamjaftueshëm. Ai ishte i uritur. Shpejt rrobat e tij u bënë leckat dhe atij iu desh të shiste gjithçka që kishte. Nuk i mbeti më asgjë. “Ndoshta mund të gjej një punë dhe të fitoj disa para.” - mendoi ai. Por e vetmja punë që gjeti ishte në një fermë - të ushqente derrat. Judenjtë nuk duhet të kishin fare të bënin me derrat.

### **Piktura IV-4**

Sa turp i vinte nga vetja! Ditë për ditë ruante derrat kur hanin. Ishte kaq i uritur sa i vinte të hante ushqimin e derrave. Në qoftë se do të vazhdonte kështu, do të vuante urie për vdekje. Ai kishte ndjekur rrugën e tij dhe ndodhej larg prej babait. Ju keni ndjekur rrugën tuaj, jo rrugën e Perëndisë.

Ju keni bërë shumë gjëra që e zemërojnë Perëndinë. Ju jeni larg prej Tij. Kjo është shumë serioze sepse Bibla thotë: *“Shpirti që mëkaton ka për të vdekur.”* (Ezekieli 18:4) Kjo do të thotë që në qoftë se ju vazhdoni në rrugën tuaj, do të ndaheni përjetë nga Perëndia. Ky është dënimi për mëkatin tuaj. Rruga juaj nuk është më e mira; edhe ky djalë po e kuptonte këtë gjithashtu.

Derra të ndytë që hungërinin! Sa i urrente ata ai djalë! Ai filloi të mendonte për shtëpinë. Solli ndër mend shtëpinë, shërbyesit dhe familjen e tij. Mendoi për gjithë atë ushqim që mund të hante, ndërsa tani po vuante urie. Ndërsa vështronte derrat, i vinte turp nga vetja për mënyrën si po jetonte. Ai tha: “Do të shkoj te Babai im, do t’i them se kam mëkatuar kundër Perëndisë. Do t’i them se më vjen keq që e braktisa dhe që ndoq rrugën time. Do t’i lë përgjithmonë këta derra dhe këtë jetë të kotë; edhe po të jem shërbyes në shtëpi do të jetë më mirë se këtu.”

### **Piktura IV-5**

Por vetëm të menduarit nuk do të kishte dobi. Ai duhej të vepronte dhe një ditë e bëri. Ai u nis për në shtëpi duke lënë pas derrat, fermerin dhe vendin e largët. Ai mendoi: “Më tepër se gjithçka tjetër, dua të kthehem në shtëpi.” A nuk thoni edhe ju: “Më tepër se çdo gjë tjetër dua që mëkati im të hiqet që të jem i pastër me Perëndinë?” Perëndia ju kërkon që të bëni atë që bëri edhe djali i ri: Ai kërkon që ju në zemrën tuaj t’i ktheni shpinën mëkatis. Çfarë dëshiron Perëndia që ju të braktisni? Gënjeshtat, mosbindjen, betimet, mashtrimin dhe çdo gjë tjetër në jetën tuaj që është e gabuar. Kur ju vjen me të vërtetë keq që keni mëkatuar ndaj Perëndisë dhe dëshironi të ktheheni nga mëkati, atëherë kjo quhet pendim. Urdhri i Perëndisë për juve është të pendoheni. Bibla thotë se Ai *“i urdhëron të gjithë njerëzit dhe kudo që të pendohen.”* (Veprat 17:30)

Këtë bëri edhe djali ndërsa u largua nga vendi i largët dhe mori rrugën për në shtëpi. Ndoshta mendonte: “Ç’do të thotë babai? A do më pranojë brenda? A do të më falë ai? U tregova kaq i marrë!” A ishte ai i ngazëllyer e i nervozuar ndërsa çapitej me zor në rrugën që e sillte gjithnjë e më afër shtëpisë?

Kur në zemrën tuaj largoheni nga mëkati (pendoheni), nuk ka ndonjë rrugë të zakonshme që ju çon përsëri tek Perëndia. Ka vetëm një rrugë për tek Perëndia. Kjo është nëpërmjet një Njeriu, Zotit Jezus Krisht. Ai ka qenë gjithmonë Biri i Perëndisë në qiell, por Ai erdhi në botë për të qenë e vetmja rrugë për t’u kthyer tek Perëndia. Ai i lejoj njerëzit ta gozhdonin mbi kryq; atje pasi vdiq dhe derdhi gjakun e Tij të çmuar, Ai mori dënimin tonë për mëkatin tonë; Ai vdiq që mëkatet të faleshin. Ai vetë nuk kishte asnjë mëkat; Ai kurrë nuk bëri nga ato gjëra për të cilat folëm më parë, por Ai vdiq për mëkatin e gjithë botës. Ja pse Ai mund të thoshte: *“Unë jam udha ... askush nuk vjen tek Ati përveçse nëpërmjet meje.”* Por ai u ngrit prej të vdekurish dhe është i gjallë përjetë. Pra, gati 2000 vjet pas vdekjes dhe ringjalljes së Tij janë ende të vërteta fjalët: *“Mund të shpëtojë plotësisht ata që me anë të tij i afrohen Perëndisë.”* (Hebrenjve 7:25) A dëshironi që mëkatet tuaja të falen? Dëshironi me gjithë zemër që të jeni të drejtë me Perëndinë? Kthehuni larg mëkatis dhe ejani tek Zoti Jezus Krisht. Tregojini Atij se me të vërtetë ju vjen keq për mëkatin tuaj dhe se besoni se Ai vdiq për ju. Kërkojini Atij që të heqë mëkatin

tuaj dhe të marrë në ngarkim jetën tuaj. Kjo është rruga juaj e kthimit tek Perëndia.

Biri më i vogël ishte në rrugën e kthimit për tek ati i tij. Edhe kur ndodhej në një largësi të madhe, ati i tij e pa atë. Ai e dëshironte dhe mezi e priste kthimin e birit të tij. Në largësi ai pa një figurë të veshur me lecka të ndyta duke ardhur drejt tij. Ndërsa Piktura afrohej ai e kuptoi që ishte Biri i tij i dashur.

#### **Piktura IV-6**

Ai vrapoi ta takonte me krahë hapur. Ai e përqafoi dhe e puthi duke qarë nga gëzimi. “Oh , Baba” - qau i Biri - “Unë kam mëkatuar kundër qiellit dhe kundër teje. Unë nuk e meritoj të jem biri yt”. Por nuk kishte më arsye e nevojë që të fliste më. Ai mund ta kuptonte se kurrë nuk do të ishte një shërbyes; ai ishte biri i tij! Ai kishte bërë mëkat dhe e dinte këtë; por mëkati i tij nuk do të rëndonte kurrë kundër tij. Gjithçka ishte falur dhe harruar! Ai nuk e meritonte por ishte e vërtetë. Ç’mirëpritje!

A doni që mëkati juaj të falet dhe të harrohet prej Perëndisë? A do të gëzoheshit në qoftë se ai nuk do të rëndonte mbi ju kurrë më? Kjo gjë do të ndodhë në qoftë se ktheheni nga mëkati tek Zoti. Kërkojini Zotit Jezus Krisht që t’ju shpëtojë nga mëkati juaj. Ju nuk e meritoni që t’ju falin, por kjo është ajo ç’ka Perëndia i premton të gjithë atyre që pendohen dhe vënë besimin e tyre tek Zoti Jezus. Oh, dashuria e Tij është shumë e madhe edhe më e madhe se dashuria e babait në këtë histori që tregoi Zoti Jezus.

#### **Piktura IV-7**

“Sillni rrobat më të mira për birin tim.” Shërbyesit vrapuan për të përmbushur urdherin. “Shkoni dhe sillni një unazë për birin tim. Biri im nuk është skllav për të qenë këmbëzbathur: sillni këpucë për të!”

“Sillni një viç e theneni se do të bëjmë festë!

*“Prandaj vdiq biri im dhe u ngjall përsëri; ai humbi dhe u gjet përsëri!”* Babai e donte me të vërtetë atë djalë! Nëse afroheni me Perëndinë nëpërmjet Jezus Krishtit, ashtu siç jeni me gjithë mëkatin tuaj, gjithçka do të falet. Perëndia ju do dhe dëshiron që t’ju marrë të jetoni më Të në qiell kur të vdisni. Perëndia gëzohet kur një mëkatar pendohet; Bibla thotë se mes engjëjve në qiell ka gëzim kur dikush i kërkon Zotit që t’i heqë mëkatin.

#### **Piktura IV-8**

A do të ketë ngazëllim në qiell sot? A dëshironi që t’ju falen mëkatet? Bindjuni me gjithë zemrën tuaj urdhit të tij për t’u kthyer nga mëkati tek Perëndia, për t’u penduar. Ejani tani tek Zoti Jezus Krisht që t’i tregoni se ju vjen keq që keni ndjekur rrugën tuaj dhe jo atë të Perëndisë. Tregojini Atij se ju besoni se Ai vdiq në vendin tuaj; kërkojini Atij që të heqë mëkatin tuaj. Nëse veproni kështu dhe e keni me gjithë zemër mëkati juaj do të falet; Perëndia do t’ju pranojë. Gjithë qielli do të gëzojë! Bibla thotë: *“Do të ketë gëzim në mes të engjëjve të Perëndisë për një mëkatar të vetëm që pendohet.”* (Lluka 15:10)

## Mësimi V

### PALI DHE SILA SHKOJNË NË FILIPI

Theks të Veçantë: Besoni në Zotin Jezus Krisht dhe jeta juaj do të NDRYSHOJË.

Vargu Përmendsh: *“Beso në Zotin Jezus Krisht dhe do të shpëtohesh ti dhe shtëpia jote.” (Veprat e Apostujve 16:31).*

Shkrimet: *Veprat e Apostujve 16:11-40*

#### Mësim

U gjuajtën me gurë prej turmës së zemëruar ... I shpëtuan një komploti të poshtër ... U liruan nga burgu prej një engjëlli ... U kapën në një mbeturinë anijeje! ... Këto ishin disa nga gjërat që i ndodhën misionarëve të parë të krishterë. *(Një misionar është dikush që shkon në vende të tjera për t'u treguar njerëzve për Jezus Krishtin).*

Pali dhe Sila ishin misionarë. Jeta për ta ishte shpesh ngazëlluese, por edhe e rrezikshme.

#### Piktura V-1

Le të bashkohemi me ta ndërsa kanë shkuar në një qytet të një toke të re. Qyteti i Filipisë që kishte shumë njerëz, ndërsa Pali dhe Sila nuk njihnin asnjë prej tyre. Por ata ishin të sigurt se ky ishte qyteti ku ata duhet të ishin. Perëndia i kishte udhëhequr ata për të ardhur këtu. *(Mund të vini në dukje Filipinë në hartë).*

Ndërsa vërenin, ata kuptuan se shumica e njerëzve nuk njihnin asgjë për Perëndinë e vetëm të vërtetë. Ata adhuronin perëndi të rreme. Sa shumë dëshironin Pali dhe Sila t'u tregonin atyre për Perëndinë dhe birin e Tij, Jezus Krishtin. Pali dhe Sila ishin misionarë që shkonin nga një vend në tjetrin duke u treguar njerëzve për Jezus Krishtin dhe sesi mund ta njihnin ata Atë. Po ku do ta fillonin ata punën e tyre në këtë qytet? Nuk kishte as edhe një ndërtesë ku njerëzit që e njihnin Perëndinë të mund të takoheshin. Në fund ata gjetën një grup njerëzish që e njihnin pjesën e parë të Biblës dhe i luteshin të vetmit Perëndi të vërtetë. Ata takoheshin pranë një lumi.

#### Piktura V-2

Këto gra që mblidheshin për t'u lutur, e njihnin Perëndinë, por nuk e dinin se Perëndia kishte dërguar Birin e Tij Jezus Krishtin në botë. Pali dhe Sila menduan se kjo ishte koha për t'u treguar atyre lajmin e mrekullueshëm. Misionarët duhet t'u kenë treguar si Biri i vetëm i Perëndisë vdiq në kryq dhe u dënua për mëkatin e gjithë botës. Sa ngazëlluese duhet të ketë qenë t'u tregoje këtyre grave se Zoti Jezus nuk mbeti i vdekur, por se Ai u ngrit prej të



vdekurit dhe është përjetë i gjallë. Për herë të parë ato gra dëgjuan se vetëm Jezus Krishti mund t'i ndreqte ato përpara Perëndisë.

Ndoshta duke dëgjuar këto gjëra rreth Zotit Jezus ka disa gjëra që nuk i kuptoni. Mundet që ju me të vërtetë dëshironi t'i kërkonit Zotit Jezus që t'ju falë mëkatin tuaj, por nuk dini sesi. Do të gëzohesha shumë sikur t'ju ndihmojë nga Bibla. Ejani të flasim së bashku pas takimit. Unë do të qëndroj atje tutje pranë asaj shtylle (ose në një vend tjetër të përshtatshëm).

Kur Pali dhe Sila shpjegonin këto gjëra, një gjë e mrekullueshme po ndodhte me njërin nga gratë që po dëgjonte. Kjo ishte Lidia, një grua e rëndësishme dhe e pasur. Bibla na tregon se ndërsa ajo dëgjonte Perëndia po vepronte në zemrën dhe jetën e saj prandaj ajo e kuptoi se çfarë thanë Pali dhe Sila. Ajo besoi Ungjillin dhe me të vërtetë dëshironte të njihete vetë Zotin Jezus Krisht. Ajo vuri besimin e saj në Zotin Jezus Krisht dhe jeta e saj ndryshoi.

Pastaj ajo u tha dy misionarëve: “Në rast se më pranoni si besimtare, ju lutem ejani të rrini në shtëpinë time.” Perëndia kishte vepruar në zemrën e në jetën e Lidias; tani ajo e njihete Zotin Jezus Krisht si Shpëtimtarin e saj. Gjithashtu Perëndia i dha asaj dashuri edhe për Kristianë të tjerë. Perëndia i ndryshon ata që Ai i shpëton. Bibla thotë : *“Prandaj nëse dikush është në Krishtin, ai është një krijesë e re.”* (2 Korintasve 5:17)

Kjo do të thotë se në qoftë se ju besoni në Zotin Jezus si shpëtimtari juaj, ju do të jeni një njeri i ri. Dukeni njësoj nga pamja e jashtme, por nga brenda do të jeni një njeri krejt i ndryshëm. Do të ndryshoheni nga një njeri mëkatar dhe i pabindur në një njeri që dëshiron t'i bindet Perëndisë. Kjo nuk do të thotë se ju do t'i bindeni kurdoherë Perëndisë, por ju nuk do të jeni më ai njeri që pak kujdeset për Perëndinë; ju do ta doni Atë. Perëndia jo vetëm ju tregon si të jetoni për Të; Ai vjen të jetojë tek ju që t'ju ndihmojë për ta bërë këtë. Pikërisht kjo i kishte ndodhur edhe Lidias.

### **Figura V-3**

Pali dhe Sila duhet të jenë mbushur me gëzim për atë që Perëndia po bënte. Ata vazhduan me punën e tyre duke i treguar të tjerëve për Jezus Krishtin. Një herë kur ata po shkonin në një vend ku njerëzit takoheshin së bashku për t'u lutur, ata takuan një skllave që dinte të tregonte fatin. Bibla na thotë se tregimi i fatit është diçka që e zemëron Perëndinë dhe ne s'duhet të kemi të bëjmë me të. *(Ligji i Përtërirë 18:10-12)*

Një shpirt i lig sundonte këtë vajzë dhe e kishte bërë atë të aftë që të parashikonte fatin. Kur pa Palin dhe Silën ajo filloi të thërriste me të madhe: *“Këta njerëz janë shërbëtorë të Perëndisë Shumë të Lartë dhe ju shpallën udhën e shpëtimit!”* Ajo që thoshte ishte e vërtetë: por për shkak të asaj që po bënte dhe mënyrës si po bërtiste ata kuptuan se Satani sundonte në jetën e saj. Tek dëgjonin vajzën e mjerë të bërtiste ashtu Pali dhe Sila u trishtuan shumë. Ajo vazhdoi t'i ndiqte ata për ditë me radhë dhe gjatë gjithë kohës thërriste me të madhe.

Në fund Pali u mërzi kaq shumë sa ndaloi u kthye dhe tha: *“Unë të urdhëroj në emër të Jezus Krishtit të dalësh prej saj!”* Dhe fryma doli që atë çast. Sa i fuqishëm është Emri i Zotit Jezus! Ai është më i fuqishëm se Satani dhe shpirtat e ligj. Ai po ndryshonte jetën e vajzës dhe mund t'ju ndryshojë edhe juve.

Mundet që ju ta dini se jeta juaj nuk është e pastër. Ju thoni gënjeshtër, keni mendime të këqija, nuk i bindeni mamit dhe Babit, përdorni Emrin e Perëndisë

për t'u betuar, ju pëlqeni të ndiqni rrugën tuaj. *“Nuk ka asnjëri të drejtë, as edhe një.” (Romakëve 3:10)*

Ju duhet të bëheni një njeri i ri. Zoti Jezus mund ta bëjë këtë për ju. Ne e dimë se Ai është i gjithëfuqishëm, sepse Ai u ngrit prej të vdekurit. Ai është i gjallë sot; Ai ka fuqinë ta ndryshojë jetën tuaj. S'ka rëndësi sa të këqij jeni ju, Zoti Jezus mund t'ju ndryshojë plotësisht.

Nëse besoni në Të për t'ju shpëtuar, ai do të falë mëkatën tuaj dhe do të ndryshojë jetën tuaj. Ai do t'ju ndihmojë të jetoni për Të. Ndoshta zemëroheni shpesh dhe të gjithë e dinë këtë. Por nëse vini tek Zoti Jezus dhe besoni në Të si Shpëtimtari juaj, Ai do ju japë fuqinë e forcën që keni nevojë për të mos u zemëruar. T'i përkisni Zotit Jezus nuk do të thotë vetëm të jeni gati për të shkuar në qiell. Do të thotë të bëhesh një njeri i ri që jeton për Perëndinë tani, në këtë jetë. Vajza skllave padyshim ndryshoi pasi u çlirua nga fryma e keqe.

#### **Figura V-4**

Por jo të gjithë ishin të lumtur me atë që kishte ndodhur. Vajza skllave kishte punuar për burra që fitonin shumë para prej punës së saj si treguese e fatit. Ata u inatosën kur e kuptuan se ajo nuk do u sillte më fitim. Ata kapën Palin dhe Silën dhe i sollën në sheshin e tregut ku qëndronin gjykatësit e qytetit. Ata i akuzuan duke thënë: “Këta njerëz që janë Judenj e turbullojnë qytetin tonë dhe predikojnë zakone që është e paligjshme për ne t'i pranojmë.” Kjo ishte gënjeshtër, por nuk kishte asnjë që të mund t'u dilte krahu Palit dhe Silës. Turma u lëshua e gjitha bashkë kundër tyre duke gënjyer dhe bërtitur kundër misionarëve.

Gjykatësit urdhëruan se ata duhej të dënoheshin ashpër. Rrobat e dy misionarëve ishin grisur, ndërsa ata të dy ishin rrahur keqas. Pas kësaj ata i futën në burg dhe urdhëruan rojtarin t'i ruante me shumë kujdes.

#### **Figura V-5**

Për t'u siguruar që të mos iknin, rojtari i futi në një qeli në pjesën më të brendshme të burgut dhe ua shtrëngoi këmbët në blloqe druri. Atje këmbët u mavijosën, rrodhën gjak dhe u shkaktuan dhembje. Duart dhe këmbët e tyre ishin të shtrënguara fort. Nuk kishte asnjë shpresë për t'u arratisur.

Por në atë qeli të pistë, të lagësht, e të errët nuk u dëgjuan qarje apo ankime. Por kishte një tingull tjetër - kënga. Pali dhe Sila po këndonin duke lavdëruar Perëndinë. Si mund ta bënin këtë? Ata e dinin se Perëndia kishte nën kontroll gjithçka që ndodhte. Ata e dinin se muret e burgut nuk mund ta mbanin jashtë Perëndinë; Ai ishte me ta. Ata ndjenin gëzim në zemrat e tyre. Sa ndryshonin ata nga të burgosurit e tjerë!

Ata që besojnë në Zotin Jezus Krisht si Shpëtimtari i tyre janë të ndryshëm sepse Perëndia i ka bërë atë njerëz të rinj. Nëse besoni në Zotin Jezus, do të ketë raste kur do të jetë e vështirë të jetoni për Të. Por mund të jeni të sigurt se Perëndia është me ju. Ai ka premtuar: *“Nuk do të të lë, nuk do të të braktis.” (Hebrenjve 13:5b)*

Perëndia do të jetë real në jetën tuaj. Ju do ta njihni Atë sepse Jezus Krishti është Shpëtimtari juaj personal. Ja pse Pali dhe Sila po i këndonin lavde Perëndisë.

Sa të çuditur duhet të kenë qenë të burgosurit e tjerë kur kanë dëgjuar këngën e tyre! Ky nuk ishte nga tingujt që ata dëgjonin shumë shpesh brenda mureve të trasha të burgut.

### **Figura V-6**

Por papritur, në mesnatë, një tjetër zhurmë çau qetësinë e ndërtesës. Çdo gjë filloi të tundej. Themelet e burgut u lëkundën. Të gjitha dyert u hapën duke fluturuar tutje. Blloqet e drurit lëvizën mënjanë. Të gjithë të burgosurve iu zgjidhën prangat. Perëndia veproi: Ai shkaktoi një tërmet.

Rojtari u zgjua nga tronditjet. Kur pa se dyert e burgut ishin të hapura e kapi paniku: “Padyshim të gjithë të burgosurit ia kanë mbathur.” - mendoi ai. “Do të më vrasin për këtë.” Nxori shpatën me shpejtësi për të vrrarë veten. Por atëherë dëgjoji një thirrje: “Mos i bëj ndonjë të keqe vetes, sepse ne të gjithë jemi këtu.” Ishte Pali.

Kur rojtari dëgjoji thirrjen e Palit thirri dikë të sillte një dritë. Në ato momente lloj lloj mendimesh përshkonin mendjen e tij: “Këta njerëz duhet të jenë shërbyes të Perëndisë Zot, përndryshe do të kishin ikur sapo të kishin pasur rastin; Perëndia duhet të ketë fuqi të madhe përderisa dërgoi një tërmet kaq të madh.” Rojtari e dinte se nuk ishte gati për të takuar këtë Perëndi të madh. Kur shkoi tek qelia ai bëri një pyetje shumë të rëndësishme: “Zotërinj, ç’duhet të bëj unë që të shpëtohem?” (Veprat e Apostujve 16:31).

### **Figura V-7**

Pali u përgjigj: “Besoj në Zotin Jezus Krisht dhe do të shpëtohesh ti dhe shtëpia jote.” (Veprat e Apostujve 16:31) Pali dhe Sila duhet ta kenë shpjeguar se ç’do të thoshte kjo. Jezus Krishti, Biri i vetëm i Perëndisë vdiq në kryq dhe u dënua për mëkatin e botës. Ai u ngrit prej të vdekurit dhe tani është në qiell me Perëndinë. Ai ishte Ai që mund ta ndreqte rojtarin para Perëndisë. Ai duhet të varet prej Zotit Jezus Krisht që Ai të heqë mëkatin e tij dhe ta bëjë atë të drejtë para Perëndisë.

Mendoni se rojtari vetëm sa dëgjoji atë që thanë Pali me Silën për Zotin Jezus dhe nuk bëri asgjë tjetër? Apo tha: “Oh, është mirë ta dish këtë?” Bibla thotë se ai besoi në Zotin Jezus Krisht për të hequr mëkatin e tij. Ai i kërkoi Zotit Jezus të falte mëkatin e tij. Jo vetëm kaq, por Bibla thotë se familja e tij gjithashtu besoi në Krisht për t’u shpëtuar. Nuk mjafton për ju vetëm të dini për Jezus Krishtin; ju duhet të besoni individualisht në Të dhe t’i kërkonit Atij që t’ju shpëtojë.

Nëse rojtari besonte me të vërtetë në Zotin Jezus, atëherë jeta e tij do të ndryshonte, apo jo? Po, ai ndryshoi. Ai mori Palin dhe Silën me vete dhe me kujdes lau plagët e tyre të shpinës me ujë. Ai i mori ata me vete në shtëpinë e tij. Ai u dha atyre ushqim. Dhe u kujdes për ta. Ç’ndryshim! Kur Zoti Jezus Krisht shpëton një njeri nga mëkati i tij, jeta e tij pëson ndryshim të vërtetë. Perëndia me Shpirtin e Shenjtë vjen të jetojë në jetën e personit në çastin që ai vë besimin e tij në Zotin Jezus. Ai i shndërron djemtë dhe vajzat e pabindur

në fëmijë të bindur. Ai i bën ata që nuk interesohen për Biblën njerëz që duan të dinë më shumë për Fjalën e Perëndisë.

### **Figura V-8**

Perëndia mund t'ju shndërrojë juve në një njeri të ri, të ndryshëm. Ai mund t'u bëjë të dashur, siç bëri me Lidian. Ai mund t'ju ndihmojë juve të hiqni dorë nga fajet, Ashtu siç bëri me treguesen e fatit. Ai mund t'ju ndihmojë të jetoni për të kënaqur Atë ashtu siç bëri me rojtarin e burgut.

A dëshironi që jeta juaj të ndryshojë? A ju vjen keq që nuk jetoni sipas mënyrës së Perëndisë? Kërkojini Zotit Jezus që t'ju falë dhe të marrë në kontroll jetën tuaj! Besoni vetëm në Të për t'u shpëtuar nga mëkati! Pastaj Zoti Jezus do të jetojë tek ju nëpërmjet Shpirtit të Tij të Shenjtë dhe ju do ta kuptoni se jeni një njeri krejt i ndryshëm. *“Besoni në Zotin Jezus Krisht dhe do të shpëtoheni ti dhe shtëpia jote.” (Veprat e Apostujve 16:31).*